

Plenchi

Bèl a bati

Bèlèm bèlèm boso tabata riba plenchi na plasa Brion djadomingu ultimo? Un selebrashon di nos Kristu Rey tur afo. Tabata yen yen di hende kontentu ta selebrá huntu. Pastor Greg a prediká masha alkaso i bunita. Pa nos tur siña historia i nifikashon di e selebrashon di Kristu Rey. Un pabien na Obispado su tim organisadó pa un tremendo homenage i adorashon na nos Kristu Rey. Pabien na tur ku tabata presente na e selebrashon. Kòrsou mester di orashon i union den positivismo.

Skolnan a pone di nan parti i a partisipá masalmente na e adorashon di djabierne ultimo na misanan rònt Kòrsou. Bunita adorashon.

Nos ta den full preparashon pa risibí nos speransa esta niño Hesus.

Bida tin dos banda ku ta mara na otro, dolor i amor. Nasementu i morto i nan kada un ta lanta emoshonan diferente. Hesus a mostra nos esaki tambe. Tin biaha ta despues di un hende su morto nos ta realisá pakiko el a nase i ki su mishon tabata na mundu. Hesus ta ehèmpel di esaki.

Den tur nos dolor pa kualke pèrdida di un ser kerí, pidi forsa pa nos dolor no strobé di bai. Den tur dolor pidi pa angelnan guia e persona i hibé mas lihé posibel den lus pa e sosegá na pas. Ban resa pa lus, pa nos ku ta presente riba e mundu aki kana den klaridat tur dia. Tambe lus pa tur ku Señor yama por kana i drenta e lus pa asina nan por sosegá na pas.

Un fin di siman yená ku lus pa bo.

Orashon

Kristu Rey keda reina na mundu pero speshalmente di nos kurason.

Rey ku korona di oro lo reina pa un siglo.

Rey ku korona di sumpiña lo reina pa eternidat.

Amen!



Selebrashon di Kristu Rey

Den agènda

- **Fakansi**
21 desèmber 2015 pa 3 yanuari 2016

Not'é riba bòrchi



Kamera di komersio huntu ku Negoshi Pikiña a organisá un siman di “bo mes negoshi”. Nan a bishitá Kolegio Maria Auxiliadora. Pabien na e organisadornan i na e hóbennan i personal di Maria Auxiliadora.

Mi ta konta

Egoismo ta lucha ku Amor.

Riba un djadomingo atardi, promé ku solo baha tabatin un fiesta di emoshon riba un boto. Tur emoshon tabatei. Speransa, ku tabata manda lus i klaridat. Amor, ku tabata hala tur presente i mara nan na otro ku dulsura. Egoismo, ku tabata hala tur atenshon i tur material pa su so. Pániko, ku tabata kita konfiansa propio i hinka miedo den tur presente. Tristesesa, ku su brel skur ku tabata mira i plama nubia skur rònt di dje. Alegria, ku tabata pone sonrisa riba tur su kara. Rabia, ku tabata plama negativismo i pone un kontra otro. Asina kada un emoshon ku su birtut.

Diripiente Rabia a kuminsá plama i multipliká. Tenshon a subi i Rabia a pusha tur otro emoshon benta na awa. Pániko a hunga su ròl mesora, pero Speransa a bai dilanti i a yama tur pa landa bai na un vlòt riba awa. Ora nan a yega, nan a sinti falta di un emoshon, Egoismo. Mesora Amor a bula bèk na awa pa e bai buske. El a hañe ta bai abou bin ariba paso e no por a landa. Mesora Amor a aserké pa e yudé. Pero Egoismo

ku ta pensa riba su so, a bula riba Amor su lomba. Mientras Amor tabata sak bai abou, el a trapa riba su lomba pa e kue e vlòt tene. Den su hazaña Amor a bai abou un par di biaha, perde rosea i no por a wantu su kabes riba awa mas.

Egoismo a subi e vlòt kontentu ku el a salba su bida. Sin niun momentu sinti kompashon pa Amor. Sin sikiera realisá ku pa salba su bida i orguyo el a sakrifiká Amor ku a bin pa yude yega e vlòt sano i salvo. Speransa, a tuma akshon. Mesora el a kue Rabia, Tristesia i Legria i tur otro emoshon i nan a traha un kadena largu pa asina bai traha un kordon pa reskatá Amor. Nan a logra hibé bèk riba e vlòt i aki nan a reanimé. Egoismo a intentá na mata Amor i saké pa semper for di mundu. Pero danki na Speransa ku Amor ta biba ainda pa tur ku no ta Egoista. Amor tei pa tur hasta pa Egoista, pero e por biba huntu ku ne solamente si e habri su kurason i siña kiko ta kompashon. Amor si no ta mata pero e ta semper dispuesto pa renobá Egoismo su kurason i transformé den Kompashon.

Un prenci

Un prenci pa tur partisipante na e kwes TUR TA KONTA. Tur ku a partisipá ta kampion. Nos mester enfrentá reto den bida. Si bai bon sigui traha pa tene bon. Si no a bai bon, bo a purba i esei ta grandi kaba. Ku bo eksperensha bo por mehorá bo mes. Of hasta bo por saka eksperensha pa otro retonan den bida. Prou of you kids. Danki na Ettienne Ys i su tim pa un tremendo trabou na bienestar di nos hóbennan. Edukativo i creativo.



Berg Carmel College ku su tim kampion ku a partisipá na Kwes Tur ta Konta.



E alumnonan ta: Jeadan Bakboord, Shunisha Loo, Rodyenne Willems, Devon Quiroz, Lennard Alcendor, Q Shawn Getruida, Nadira de Boer, Inosha Bonifasia, Christina Nicolas, Jevaughn Maduro, Keysean Cornelia, Christopher Marshall.



Sta. Rosa de Lima bayendo Kwes TUR TA KONTA



E tim yen di zjeitu di sta. Rosa de Lima



Presentenan na e kwes

Mucha djispou

Yufrou: “Gileon, si bo regalá tur bo kosnan di hunga i pañanan na muchanan pober bo ta bai shelu?”

Gileon: “No, yufrou.”

Yufrou: “Si bo limpia misa tur siman i duna pobernan kuminda bo ta bai shelu?”

Gileon: “No, yufrou.

Yufrou: “Kiko bo mester hasi anto pa bo tin sigur ku bo ta bai shelu Gileon?”

Gileon: “Muri yufrou.”